

# The Language o God

**G**OD ligs weel abuin the Touer o Babel an is weel able tae yaise an unnerstaund aw an ony o the world's languages. God kens that tae rax doon tae the herts o fowk, he maun yaise the words that fowks' herts kens best an sae he speaks tae the French in French, tae the Germans in German, tae the Spanish in Spanish, tae the English in English an tae aw the nations o the yird in the language o thon nation.

The ae exception tae this wad appear tae be Scotland or tae be mair tae the pynt, the Scots speakers in Scotland that hears the word o God maistly juist spoken in English bi the Kirk o Scotland.

Daes the Kirk think that God is ower donnert tae unnerstaund Scots or daes it think that Scots is ower hard a language for God tae get His tung roond? Mibbe they think it's no polite eneuch for the Almichty tae yaise an nicht gar him creenge or aiblins it nicht bring oot the creenge in some o the kirk maimbers.

Yin o Scots Tung's upsteerin maimbers, a God fearin body frae the Borders that bides in England noo, haes been screivin tae the Kirk o Scotland anent this want o the Scots language in maist o the Kirk's ongauns an he reportit tae the Wittins that the guid news he haed raicently gotten frae the Kirk o Scotland at 121 Gorge St. Edinburgh, threapit that they haed juist setten up a group tae forder the yuiss o Scots in worship an they war howpin that a buik anent thon maitter wad kythe suin.

Appearinly, the group eiks in David Ogston o the heid Perth kirk, Donald Smith o the Netherbow an Dr Alasdair Allan o the Kirk's media office.